

JAMHURI YA MUUNGANO WA TANZANIA



BUNGE LA TANZA

**TAARIFA YA KAMATI YA KUDUMU YA BUNGE YA UTAWALA, KATIBA
NA SHERIA KUHUSU UTEKELEZAJI WA BAJETI YA OFISI YA MAKAMU
WA RAIS MUUNGANO KWA MWAKA WA FEDHA 2022/2023 PAMOJA
NA MAONI YA KAMATI KUHUSU MAKADIRIO YA MAPATO NA
MATUMIZI YA OFISI HIYO KWA MWAKA WA FEDHA 2023/2024**

Idara ya Kamati za Bunge,
Ofisi ya Bunge,
10 Barabara ya Morogoro
S.L.P. 941,
40490 Tambukareli,
DODOMA.

24 APRILI, 2023

YALIYOMO

Ukurasa

SEHEMU YA KWANZA	1
1.0 UTANGULIZI	1
1.1. Maelezo ya Awali	1
SEHEMU YA PILI	3
2.0 MATOKEO YA UCHAMBUZI NA TATHMINI	3
2.1 Ufafanuzi wa Jumla	3
2.2 Matokeo ya Uchambuzi wa Taarifa za Utekelezaji wa Bajeti kwa mwaka wa fedha 2022/2023	4
2.2.1 Fungu Na. 26 - Ofisi Binafsi ya Makamu wa Rais	4
2.2.2 Fungu Na. 31 - Ofisi Makamu wa Raisi Muungano.....	5
2.3 Utekelezaji wa Mipango na Majukumu ya Ofisi ya Makamu wa Rais Muungano.....	7
2.4 Tathmini ya Utekelezaji wa Miradi ya Maendeleo	8
2.4.1 Ukarabati wa Makazi ya Makamu wa Rais Kilimani – Dodoma na Oysterbay Dar es Salaam	9
2.4.2 Ukarabati wa Jengo la Ofisi ya Makamu wa Rais Luthuli II - Dar es Salaam	9
2.5 Utekelezaji wa Maoni, Ushauri na Mapendekezo ya Kamati	10
2.6 UCHAMBUZI WA MAKADIRIO YA MAPATO NA MATUMIZI KWA MWAKA WA FEDHA 2023/2024	10
2.6.1 Uchambuzi wa Matumizi ya Kawaida	11
2.6.2 Uchambuzi wa Miradi ya Maendeleo	12
SEHEMU YA TATU	14
3.0 MAONI NA USHAURI WA KAMATI	14
3.1 Maoni.....	14
3.2 Ushauri wa Kamati	15
SEHEMU YA NNE	16
4.0 HITIMISHO	16
4.1 Maelezo ya Kuhitimisha	16

ORODHA YA VIELELEZO

KIELELEZO NA. 1: Mchanganuo wa Matumizi ya Kawaida 2022/2023.....	7
KIELELEZO NA. 2: Mchanganuo wa Bajeti ya Maendeleo 2022/2023	7
KIELELEZO NA. 3: Mchanganuo wa Bajeti ya Matumizi ya Kawaida 2022/2023 na Uwiano wa Makadirio ya Bajeti ya Matumizi ya Kawaida 2023/2024.....	12

**TAARIFA YA KAMATI YA KUDUMU YA BUNGE YA UTAWALA, KATIBA
NA SHERIA KUHUSU UTEKELEZAJI WA BAJETI YA OFISI YA MAKAMU
WA RAIS MUUNGANO KWA MWAKA WA FEDHA 2022/2023 PAMOJA
NA MAONI YA KAMATI KUHUSU MAKADIRIO YA MAPATO NA
MATUMIZI YA OFISI HIYO KWA MWAKA WA FEDHA 2023/2024**

SEHEMU YA KWANZA

1.0 UTANGULIZI

1.1. Maelezo ya Awali

Mheshimiwa Spika, kwa mujibu wa **Kanuni ya 118 (9)** ya Kanuni za Kudumu za Bunge, Toleo la Februari, 2023, naomba kuwasilisha Taarifa ya Kamati ya Kudumu ya Bunge ya Utawala, Katiba na Sheria Kuhusu Utekelezaji wa Bajeti ya Ofisi ya Makamu wa Rais Muungano kwa Mwaka wa Fedha 2022/2023 pamoja na maoni ya Kamati Kuhusu Makadirio ya Mapato na Matumizi ya Ofisi hiyo kwa Mwaka wa Fedha 2023/2024.

Mheshimiwa Spika, ili kukidhi matakwa yaliokusudiwa na Kanuni ya 118 (9) ya Kanuni za Kudumu za Bunge, Taarifa hii imegawanyika katika sehemu zifuatazo: -

- a) Sehemu ya Kwanza inatoa maelezo ya jumla kuonesha msingi na Muundo wa taarifa pamoja na namna Kamati ilivyofanya kazi;

- b) Sehemu ya pili inahusu uchambuzi wa Makadirio ya Mapato na Matumizi kwa mwaka wa fedha 2023/2024;
- c) Sehemu ya tatu inahusu majumuisho ya maoni na ushauri wa Kamati; na
- d) Sehemu ya nne ni Hitimisho.

1.2. Msingi wa Uchambuzi

Mheshimiwa Spika, Msingi wa Kamati kufanya uchambuzi wa Taarifa ya Utekelezaji wa Bajeti na Makadirio ya Ofisi ya Makamu wa Rais Muungano na Mazingira ni kwa mujibu wa Kanuni za Kudumu za Bunge, Toleo la Februari, 2023. Kifungu cha 6(2)(b) kikisomwa kwa pamoja na Kifungu cha 7 (1)(a) cha Nyongeza ya Nane ya Kanuni za Kudumu za Bunge, zinatambua jukumu la Kamati hii kufanya uchambuzi huo. Aidha, Kanuni ya 118(4) ya Kanuni za Kudumu za Bunge imeweka masharti yanayotaka Taarifa ya Utekelezaji na Makadirio ya Ofisi hii kuchambuliwa na Kamati kabla ya kujadiliwa Bungeni. Naomba kulitaarifu Bunge lako tukufu kuwa masharti hayo yamezingatiwa.

1.3. Mawanda ya Uchambuzi

Mheshimiwa Spika, Katika uchambuzi huo, Kamati ilipitia jumla ya mafungu mawili (2) ambayo ni:-

- a) **Fungu 26** - Ofisi Binafsi ya Makamu wa Rais,
- b) **Fungu 31** - Ofisi ya Makamu wa Rais Muungano.

SEHEMU YA PILI

2.0 MATOKEO YA UCHAMBUZI NA TATHMINI

2.1 Ufafanuzi wa Jumla

Mheshimiwa Spika, matokeo ya uchambuzi wa Taarifa za Utekelezaji wa Bajeti na Makadirio ya Mapato na Matumizi yanaweka msingi wa ushauri wa Kamati kuhusu hoja hii ya Ofisi ya Makamu wa Rais Muungano na Mazingira. Kwa msingi huo, ili kuwezesha ufuatiliaji mzuri wa wasilisho hili, Taarifa hii imejielekeza kwenye maeneo yafuatayo:-

- (a) Matokeo ya Uchambuzi wa Taarifa za Utekelezaji wa Mpango na Bajeti kwa mwaka wa fedha 2022/2023;
- (b) Taarifa ya Utekelezaji wa Miradi ya Maendeleo kwa mwaka wa fedha 2022/2023;
- (c) Uzingatiaji wa Maazimio ya Bunge; na
- (d) Uchambuzi wa Makadirio ya Mapato na Matumizi kwa mwaka wa fedha 2023/2024.

2.2 Matokeo ya Uchambuzi wa Taarifa za Utekelezaji wa Bajeti kwa mwaka wa fedha 2022/2023

Mheshimiwa Spika, napenda kulijulisha Bunge lako Tukufu kwamba, Kamati ilizingatia Kanuni ya 117 (2) ya Kanuni za Kudumu za Bunge, na kuchambua Taarifa za Utekelezaji wa Bajeti ya Ofisi ya hii. Kazi hiyo ilifanyika tarehe 24 Machi, 2023. Uchambuzi huo umejikita kwenye kulinganisha uwiano wa fedha zilizoidhinishwa, fedha zilizopokelewa pamoja na Utekelezaji wa Miradi ya Maendeleo kwa mwaka wa fedha 2022/2023. Uchambuzi huo ni kama ifuatavyo: -

2.2.1 Fungu Na. 26 - Ofisi Binafsi ya Makamu wa Rais

Mheshimiwa Spika, kwa mwaka wa fedha 2022/2023, fungu hili lilidhinishiwa jumla ya **Sh. 12,974,292,000** kwa matumizi ya kawaida, kati ya fedha hizo **Sh. 974,292,000** sawa na **asilimia 7.5** ilitengwa kwa ajili ya Mishahara (PE) na **Sh. 12,000,000,000** sawa na **asilimia 92.5** ilitengwa kwa ajili ya Matumizi mengineyo (OC).

Mheshimiwa Spika, hadi kufikia Februari, 2023 Fungu hili lilipokea jumla ya **Sh. 8,547,743,696.7** kwa matumizi ya kawaida sawa na **asilimia 65.9**. Kati ya fedha hizo, **Sh. 446,963,096.7** sawa na **asilimia 45.9** ilipokelewa kwa ajili ya Mishahara (PE) na **Sh.**

8,100,780,600 sawa na **asilimia 67.5** ilipokelewa kwa ajili ya Matumizi Mengineyo (OC).

Mheshimiwa Spika, Kamati ilielezwa kuwa sababu zilizopelekea Fungu hili kupata bajeti pungufu ya matarajio kwa ajili ya matumizi ya kawaida hususan bajeti ya Mishahara ni matarajio ya ofisi hii kuwa na ajira mpya ambao hadi Februari, 2023 hawakupokea Watumishi wapya wala Watumishi waliopandishiwa vyeo.

2.2.2 Fungu Na. 31 - Ofisi Makamu wa Raisi Muungano

Mheshimiwa Spika, kwa mwaka wa fedha 2022/2023, Ofisi ya Makamu wa Rais Muungano na Mazingira iliidhinishiwa jumla ya **Sh. 13,409,672,470**. kati ya fedha hizo **Sh. 2,361,333,270** sawa na **asilimia 17.6** ilitengwa kwa ajili ya Mishahara (PE) na **Sh. 8,228,339,200** sawa na **asilimia 61.4** ilitengwa kwa ajili ya Matumizi mengineyo (OC). Aidha, **Sh. 2,820,000,000** sawa na **asilimia 21** ilitengwa kwa ajili ya miradi ya maendeleo.

Mheshimiwa Spika, hadi kufikia Februari, 2023 Fungu hili lilipokea jumla ya **Sh. 7,630,238,323.84** sawa na **asilimia 57**. Kati ya fedha hizo, **Sh. 1,321,278,127.9** zilipokelewa kwa ajili ya Mishahara (PE) na **Sh. 5,329,546,196.2** zilipokelewa kwa ajili ya Matumizi mengineyo (OC). Aidha, **Sh.**

1,079,413,999.72 sawa na **asilimia 38.27** zilipokelewa kwa ajili ya Maendeleo.

Mheshimiwa Spika, Kamati ilielezwa kuwa sababu zilizopelekea kupata bajeti pungufu ya matarajio kwa ajili ya mradi wa maendeleo hadi kufikia Februari, 2023 ni ucheleweshaji wa kuandaa hati za malipo.

Mheshimiwa Spika, uchambuzi wa upatikanaji wa fedha hizo unaonesha kwamba, kwa ujumla Ofisi ya Makamu wa Rais Muungano na Mazingira iliidhinishiwa jumla ya **Sh. 29,203,964,470** kwa mwaka wa fedha 2022/2023, hadi kufikia Februari, 2023 Ofisi hii ilipokea Jumla ya **Sh. 17,257,396,020.26** sawa na **asilimia 60** ya bajeti iliyo idhinishiwa na Bunge.

Mheshimiwa Spika, Kamati inaishauri Serikali ihakikishe kwamba fedha zote zilizoidhinishwa na Bunge kwa ajili ya taasisi zilizo chini ya Ofisi hii zinapatikana kabla ya kuisha kwa mwaka wa fedha 2022/2023.

Mchanganuo wa fedha hizo kwa taasisi za Ofisi ya Makamu wa Rais Muungano na Mazingira ni kama inavyoonekana katika **Kielelezo Na. 1** na **Na. 2.**

KIELELEZO NA. 1: Mchanganuo wa Matumizi ya Kawaida 2022/2023

FUNGU	FEDHA YA MATUMIZI YA KAWAIDA ILİYOTENGWA KWA MWAKA 2022/2023	FEDHA YA MATUMIZI YA KAWAIDA ILİYOPokelewa Hadi Kufikia Februari, 2023	ASILIMIA YA MAPOKEZI
Fungu 26 – Ofisi binafsi ya Makamu wa Rais	12,974,292,000	8,547,743,696.7	65.9
Fungu 31 – Ofisi ya Makamu wa Rais Muungano na Mazingira	10,589,672,470	6,650,824,324.12	63
JUMLA KUU	23,563,964,470	15,198,568,020.8	64.5

***Chanzo:** Randama za Ofisi ya Makamu wa Rais Muuungano na Mazingira, 2023.*

KIELELEZO NA. 2: Mchanganuo wa Bajeti ya Maendeleo 2022/2023

FUNGU	FEDHA YA MAENDELEO ILİYOTENGWA KWA MWAKA 2022/2023	FEDHA YA MAENDELEO ILİYOPokelewa Hadi Kufikia Februari, 2023	ASILIMIA YA MAPOKEZI
Fungu 31 – Ofisi ya Makamu wa Rais Muungano na Mazingira	2,820,000,000	1,079,413,999.72	38.27
JUMLA KUU	2,820,000,000	1,079,413,999.72	38.27

***Chanzo:** Randama za Ofisi ya Makamu wa Rais Muuungano na Mazingira, 2023.*

2.3 Utekelezaji wa Mipango na Majukumu ya Ofisi ya Makamu wa Rais Muungano

Mheshimiwa Spika, bajeti iliyoidhinishwa kwa mwaka wa fedha 2022/2023 ililenga kufanikisha utekelezaji wa mipango na majukumu ya Ofisi ya Makamu wa Rais, Muungano na taasisi zilizopo chini ya Ofisi hiyo. Ili

kuliwezesha Bunge kujiridhisha na mwenendo wa Matumizi unaoakisi madhumuni ya kuidhinishwa kwa bajeti hiyo, Kamati ilichambua utekelezaji wa mipango na majukumu ya Wizara hii.

Mheshimiwa Spika, naomba kulijulisha Bunge lako tukufu kuwa kwa kiasi kikubwa utekelezaji wa bajeti umezingatia mipango na majukumu yaliyooombewa fedha.

Mheshimiwa Spika, kutokana na hali hiyo, Kamati inampongeza kwa dhati **Mhe. Dkt Philip Isdor Mpango Makamu wa Rais wa Jamhuri ya Muungano wa Tanzania** kwa usimamizi madhubuti wa Utawala Bora.

2.4 Tathmini ya Utekelezaji wa Miradi ya Maendeleo

Mheshimiwa Spika, kwa mwaka wa fedha 2022/2023, Ofisi hii ilitengewa jumla ya **Sh. 2,820,000,000** kwa ajili ya miradi ya maendeleo, hadi kufikia Februari, 2023 kiasi cha **Sh. 1,079,413,999.72** kwa ajili ya ukarabati wa makazi ya Mhe. Makamu wa Rais Kilimani Dodoma na Oysterbay Dar es salaam pamoja na ukarabati wa Ofisi ya Makamu wa Rais Luthuli II – Dar es salaam.

Mheshimiwa Spika, Kamati ilielezwa kuwa utekelezaji wa miradi hiyo hadi kufikia Februari, 2023 ni kama ifuatavyo:-

2.4.1 Ukarabati wa Makazi ya Makamu wa Rais Kilimani – Dodoma na Oysterbay Dar es Salaam

Hadi kufikia Machi, 2023, jumla ya shilingi **991,477,872.87** zimekwishalipwa kwa mkandarasi *M/s Corporation Sole Works Superintendent* kwa ajili ya kazi zilizofanyika ambazo zinajumuisha: Ujenzi wa ukuta; ujenzi wa nyumba ya mapumziko kwa ajili ya madereva; na ujenzi wa miundombinu mingine.

2.4.2 Ukarabati wa Jengo la Ofisi ya Makamu wa Rais Luthuli II - Dar es Salaam

Hadi kufikia Machi, 2023, jumla ya shilingi **87,936,086.85/=** zimekwishalipwa kwa mkandarasi *ARU Built Environment Consulting Company Ltd.* Kazi zilizotekelezwa ni pamoja na: Uzibaji wa nyufa katika kuta; ukarabati wa dari; kupaka rangi ndani na nje ya jengo; kuweka mfumo wa zimamoto; kukarabati mfumo wa maji safi na maji taka; kukamilisha uzio; na kukarabati milango, ngazi na geti la kuingilia. Kazi zinazoendelea ambazo zipo katika hatua za awali ni pamoja na matengenezo ya sehemu ya kuegesha magari.

2.5 Utekelezaji wa Maoni, Ushauri na Mapendekezo ya Kamati

Mheshimiwa Spika, wakati wa kupitia na kuidhinisha Makadirio ya Mapato na Matumizi ya Ofisi ya Makamu wa Rais, Muungano na Mazingira kwa mwaka wa fedha 2022/2023, Kamati ilitoa Maoni na Ushauri katika maeneo Matano (5). Napenda kulitaarifu Bunge lako Tukufu kuwa kwa kiasi kikubwa ushauri wa Kamati umezingatiwa.

Mheshimiwa Spika, Mfano wa ushauri uliozingatiwa, unahusu Ofisi hii kuondoa kipengele cha makusanyo katika Makadirio ya Mapato iwapo Ofisi hii haina vyanzo vyake vya makusanyo ya maduhuli, kwenye Randama za Ofisi hii zilizowasilishwa Machi, 2023 kipengele cha Makusanyo ya Maduhuli kimeondolewa kama ilivyoshauriwa na Kamati.

2.6 UCHAMBUZI WA MAKADIRIO YA MAPATO NA MATUMIZI KWA MWAKA WA FEDHA 2023/2024

Mheshimiwa Spika, Kanuni za Kudumu za Bunge zimetambua umuhimu wa uzoefu unaopatikana katika mwaka wa fedha unaoisha ili kuchambua Makadirio ya Mapato na Matumizi kwa mwaka wa fedha unaofuata kama ilivyoelekezwa katika Kanuni ya 117 (2) ya Kanuni za Kudumu za Bunge. Kamati imezingatia umuhimu huo na masharti ya Kanuni za Bunge kwa kuchambua

Makadirio ya Mapato na Matumizi kwa mwaka wa fedha 2023/2024 kama ifuatavyo:-

2.6.1 Uchambuzi wa Matumizi ya Kawaida

Mheshimiwa Spika, Katika Mwaka wa Fedha 2023/2024 Ofisi ya Makamu wa Rais Muungano na Mazingira pamoja na taasisi zilizo chini yake inaomba kuidhinishiwa jumla ya **Sh. 26,801,422,100** Ikiwa ni Fedha za Matumizi ya Kawaida, kati ya fedha hizo **Sh. 3,740,760,000** ni kwa ajili ya mishahara (PE) na **Sh. 23,060,662,100** ni kwa ajili ya matumizi mengineyo (OC).

Mheshimiwa Spika, Bajeti ya Matumizi ya Kawaida katika Mwaka wa Fedha 2023/2024 imeongezeka kwa **asilimia 1.58** ukilinganisha na Mwaka wa Fedha unaoisha ambapo bajeti ya Matumizi ya kawaida ilikuwa **Sh. 26,383,964,470** Kamati imebaini kwamba, moja kati ya sababu ya ongezeko hili ni maoni ya Kamati kwamba Serikali ipange bajeti kulingana na mahitaji halisi. Aidha, ongezeko hilo linaakisi mahitaji ya kifedha kulingana na sababu mbalimbali za kiuchumi ikiwemo kupanda kwa bei ya bidhaa na huduma.

Hata hivyo, Kamati inashauri Serikali kuhakikisha kwamba fedha zinazoombwa zinatumiwa vizuri. Na ili kuhakikisha hili linatekelezwa ipasavyo, Kamati inaishauri Serikali kuhakikisha kwamba inawasilisha

mbele ya kamati taarifa mbalimbali za utekelezaji wa bajeti kwa mujibu wa Sheria. Mchanganuo wa fedha hizo ni kama unavyoonekana kwenye **Kielelezo Na. 3**

KIELELEZO NA. 3: Mchanganuo wa Bajeti ya Matumizi ya Kawaida 2022/2023 na Uwiano wa Makadirio ya Bajeti ya Matumizi ya Kawaida 2023/2024

FUNGU	FEDHA YA MATUMIZI YA KAWAIDA ILIYOTENGWA KWA MWAKA 2022/2023	MAKADIRIO YA FEDHA YA MATUMIZI YA KAWAIDA KWA MWAKA WA FEDHA 2023/2024	ASILIMIA YA ONGEZEKO
Fungu 26 – Ofisi binafsi ya Makamu wa Rais	12,974,292,000	14,731,640,000	13.54
Fungu 31 – Ofisi ya Makamu wa Rais	10,589,672,470	12,069,782,100	14
JUMLA KUU	26,383,964,470	26,801,422,100	1.58

Chanzo: Randama za Ofisi ya Makamu wa Rais Muuungano na Mazingira, 2023.

2.6.2 Uchambuzi wa Miradi ya Maendeleo

Mheshimiwa Spika, katika Mwaka wa Fedha 2023/2024 Ofisi ya Makamu wa Rais, Muungano na Mazingira inaomba kuidhinishiwa jumla ya **Sh. 2,002,000,000** kwa ajili ya Utekelezaji wa Miradi ya Maendeleo, Kiasi hichi cha fedha kinatokana na fedha za ndani.

Mheshimiwa Spika, bajeti ya maendeleo katika Mwaka wa Fedha 2023/2024 imepunguwa kwa **Sh.**

818,000,000 sawa na **asilimia 40.9** ya upungufu ukilinganisha na bajeti ya Mwaka wa Fedha unaoisha.

Mheshimiwa Spika, Kamati ilielezwa kuwa sababu ya upungufu wa bajeti ya maendeleo nikutokana na kutokuwepo kwa mradi mpya unaotekelezwa na Ofisi hii kwa mwaka wa fedha 2023/2024, Ofisi hii inaomba fedha za ukamilishaji wa mradi wa ukarabati wa Ofisi ya Makamu wa Rais Dodoma, Dar es salaam na Pemba ulioanza kutekelezwa kwa mwaka wa fedha 2022/2023.

SEHEMU YA TATU

3.0 MAONI NA USHAURI WA KAMATI

3.1 Maoni

Mheshimiwa Spika, baada ya maelezo hayo, naomba kukamilisha uchambuzi kwa kubainisha Maoni ya Kamati yanayojenga mtazamo ambao ni msingi wa Ushauri wa Kamati. Maoni hayo ni kama ifuatavyo:-

- (a) Ushauri unaotolewa Bungeni kuhusu utekelezaji wa Mipango, Majukumu na Bajeti unahitaji kupewa nafasi stahiki ili kukidhi matarajio ya Wananchi;
- (b) Kuna umuhimu wa kufanikisha upatikanaji wa kiasi chote cha fedha ya bajeti iliyoidhinishwa na Bunge kwa ajili ya Ofisi hii, ili kutekeleza mipango iliyokusudiwa kwa mwaka wa fedha unaoisha; na
- (c) Upo umuhimu wa Wizara kuendelea kutoa elimu ya mara kwa mara kuhusu umuhimu na faida za Muungano.
- (d) Serikali ifanye tathmini ya uwiano wa Watumishi wa umma kwenye taasisi za Muungano, ili kubaini kama mgawanyo wa Watumishi umezingatia pande zote mbili za Muungano.
- (e) Upo umuhimu wa Serikali kufanya marekebisho ya Sheria ili kutoa fursa sawa ya ugawaji wa fedha za mfuko wa jimbo kwa Wabunge wa Tanzania Bara na Tanzania Zanzibar.

3.2 Ushauri wa Kamati

Mheshimiwa Spika, kwa Maoni niliyobainisha kutokana na uchambuzi, naomba kutoa Ushauri wa Kamati kama ifuatavyo:-

- (a) Serikali iendelee kutoa elimu ya kutosha kuhusu historia, faida na umuhimu wa Muungano wetu katika ngazi mbalimbali kwenye jamii;
- (b) Serikali ihakikishe kuna uwiano wa Watumishi kwenye taasisi za Muungano kwa kuzingatia pande zote mbili za Muungano;
- (c) Serikali ihakikishe kuwa fedha inayoidhinishwa na Bunge kwa ajili ya Ofisi hii na Taasisi zake inapatikana kwa ukamilifu ili kufanikisha utekelezaji wa majukumu yaliyopangwa;
- (d) Serikali ihakikishe kuna usawa kwenye ugawaji wa fedha za mfuko wa jimbo kwa Wabunge wa Tanzania bara na Tanzania Zanzibar.

SEHEMU YA NNE

4.0 HITIMISHO

4.1 Maelezo ya Kuhitimisha

Mheshimiwa Spika, napenda kukushukuru wewe binafsi, Naibu Spika na Wenyevidi wote wa Bunge kwa Uongozi wenu na kutupatia nafasi ya kuwasilisha taarifa hii. Napenda kuwashukuru Wajumbe wa Kamati ya Kudumu ya Bunge ya Utawala, Katiba na Sheria ambao maoni, ushauri na ushirikiano wao umewezesha Kamati kutekeleza majukumu yake kwa ufanisi wa hali ya juu na hatimaye kukamilika kwa taarifa hii. Naomba majina yao yaingizwe kwenye taarifa rasmi za Bunge kama yalivyowasilishwa.

1. Mhe. Dkt. Joseph K. Mhagama, Mb. - **Mwenyekiti**
2. Mhe. Florent Laurent Kyombo, Mb. – **M/Mwenyekiti**
3. Mhe. Abdullah Ali Mwinyi, Mb. - Mjumbe
4. Mhe. Rashid Abdallah Shangazi, Mb. - Mjumbe
5. Mhe. Wanu Hafidh Ameir, Mb. - Mjumbe
6. Mhe. Edward Olelekaita Kisau, Mb. - Mjumbe
7. Mhe. Boniphace Nyangindu Butondo, Mb.
8. Mhe. Dkt. Alice Karungi Kaijage, Mb. - Mjumbe
9. Mhe. Khadija Shaaban Taya, Mb. - Mjumbe
10. Mhe. Jonas Van Zeeland, Mb. - Mjumbe
11. Mhe. Selemani Jumanne Zedi, Mb. - Mjumbe
12. Mhe. Tumaini Bryceson Magessa, Mb. - Mjumbe

13. Mhe. Salum Mohammed Shaafi, Mb. - Mjumbe
14. Mhe. Yahya Omary Massare, Mb. - Mjumbe
15. Mhe. Agnesta Lambert Kaiza, Mb. - Mjumbe
16. Mhe. Abeid Ighondo Ramadhani, Mb.- Mjumbe
17. Mhe. Mashimba Mashauri Ndaki, Mb. - Mjumbe
18. Mhe. Hussein Nassor Amar, Mb. - Mjumbe
19. Mhe. Ahmed Juma Ngwali, Mb. - Mjumbe
20. Mhe. Omar Issa Kombo, Mb. - Mjumbe

Mheshimiwa Spika, kwa niaba ya Wajumbe wa Kamati naomba nichukue fursa hii kumpongeza Mhe. Dkt. Selemani Saidi Jafo (Mb) Waziri wa Nchi Ofisi ya Makamu wa Rais – Muungano na Mazingira pamoja na Naibu Waziri wake Mhe. Khamis Hamza Khamis (Mb) ambao wametoa ushirikiano mkubwa kwa Kamati.

Mheshimiwa Spika, naomba pia niwashukuru watendaji wote wa Ofisi ya Makamu wa Rais – Muungano na Mazingira pamoja na taasisi zake kwa ushirikiano walioupatia Kamati wakiongozwa na Katibu Mkuu wa Ofisi hiyo Ndg. Mary Ngelela Maganga.

Mheshimiwa Spika, mwisho lakini sio kwa umuhimu, napenda kumshukuru Katibu wa Bunge Ndg. Nenelela Mwiambi, *ndc* kwa kuratibu vema shughuli za Kamati na Bunge kwa mujibu wa Katiba ya Nchi. Aidha, nawashukuru Kaimu Mkurugenzi wa Idara ya kamati za Bunge Ndg. Michael Chikokoto, *ndc* Mkurugenzi Msaidizi Ndg. Gerald Magili na Makatibu wa Kamati hii Ndg.

Frank Nkya, Ndg. Praisegod Lukio na Ndg. Ganjatu Kilemle wakisaidiwa na Bi. Theresia Jacob, kwa kuratibu shughuli za Kamati na kufanikisha kukamilika kwa taarifa hii.

Mheshimiwa Spika, baada ya maelezo hayo, sasa naliomba Bunge lako tukufu likubali kujadili na kuidhinisha Makadirio ya Mapato na Matumizi ya Ofisi ya Makamu wa Rais – Muungano na Mazingira kwa Mwaka wa Fedha 2023/2024 kama yalivyowasilishwa na mtoa hoja.

Mheshimiwa Spika, naomba kuwasilisha na ninaunga mkono hoja.

Dkt. Joseph Kizito Mhagama, Mb

MWENYEKITI WA KAMATI YA KUDUMU YA BUNGE

YA UTAWALA, KATIBA NA SHERIA

24 Aprili, 2023